

ÁKVÖRÐUN RÁÐSINS

frá 24. október 1994

um rýmkun lögverndar svæðislýsinga smárása á hálfleiðurum þannig að hún nái til persóna frá Kanada(*)

(94/700/EB)

RÁÐ EVRÓPUSAMBANDSINS HEFUR,

með hliðsjón af stofnsáttmála Evrópubandalagsins,

með hliðsjón af tilskipun ráðsins 87/54/EBE frá 16. desember 1986 um vernd svæðislýsinga smárása á hálfleiðurum ⁽¹⁾, einkum 7. mgr. 3. gr.,

með hliðsjón af tillögu framkvæmdastjórnarinnar,

og að teknu tilliti til eftirfarandi:

Réttur til lögverndar svæðislýsinga smárása á hálfleiðurum í bandalaginu nær til þeirra persóna sem eiga rétt á vernd samkvæmt 1. til 5. mgr. 3. gr. tilskipunar 87/54/EBE.

Heimilt er að rýmka þennan rétt með ákvörðun ráðsins þannig að hann nái til þeirra sem njóta ekki verndar samkvæmt fyrrgreindum ákvæðum.

Æskilegt er að ákvörðun um rýmkun þeirrar verndar sem hér um ræðir sé tekin fyrir bandalagið í heild, að því marki sem unnt er.

Áður hefur persónum frá tilteknum löndum og yfirráðasvæðum utan bandalagsins í einstökum tilvikum verið veitt vernd sem er þá gagnvirk, í sumum tilvikum ótímabundið, samanber ákvörðun 90/510/EBE ⁽²⁾, en tímabundið í öðrum, samanber ákvörðun 93/16/EBE ⁽³⁾.

Í Kanada er í gildi löggjöf sem veitir hönnuðum svæðislýsinga tilhlýðilega vernd og hafa Kanadamenn tilkynnt að þeir hafi í hyggju að rýmka gildissvið löggjafarinnar, frá og með 1. nóvember 1994, þannig að hún nái til ríkisborgara bandalagsins og einstaklinga og lögpersóna sem eru með raunverulegan atvinnurekstur þar í þeim tilgangi að hanna svæðislýsingar eða framleiða smárásir.

(*) Þessi EB-gerð, sem birtist í Stjttíð. EB nr. L 284, 1. 11. 1994, bls. 61, var nefnd í ákvörðun sameiginlegu EES-nefndarinnar nr. 54/95 frá 22. júní 1995 um breytingu á XVII. viðauka (Hugverkaréttindi) við EES-samninginn, sjá þessa útgáfu af EES-viðbæti við Stjórnartíðindi Evrópubandalagsins.

⁽¹⁾ Stjttíð. EB nr. L 24, 27. 1. 1987, bls. 36.

⁽²⁾ Stjttíð. EB nr. L 285, 17. 10. 1990, bls. 29. Ákvörðuninni var breytt með ákvörðun 93/17/EBE (Stjttíð. EB nr. L 11, 19. 1. 1993, bls. 22).

⁽³⁾ Stjttíð. EB nr. L 11, 19. 1. 1993, bls. 20. Ákvörðuninni var breytt með ákvörðun 93/520/EBE (Stjttíð. EB nr. L 246, 2. 10. 1993, bls. 31) sem veitir einstaklingum frá Bandaríkjunum Norður-Ameríku vernd tímabundið (til 31. 12. 1993) og frá tilteknum landsvæðum (til 31. 12. 1994), og ákvörðun 94/373/EBE (Stjttíð. EB nr. L 170, 5. 7. 1994, bls. 34) sem framlengir verndina að því er varðar Bandaríki Norður-Ameríku til 1. júlí 1995.

Samningurinn um hugverkarétt í viðskiptum, sem er hluti af niðurstöðum Úrúgvæ-samningaviðræðnanna um marghliða viðskipti og fellur undir Marakess-lokagerðina frá 15. apríl 1994, leggur aðilum þær skyldur á herðar að veita svæðislýsingum smárása vernd í samræmi við ákvæði samningsins, og ákvæði sáttmálans um hugverk er varða smárásir, sem hann vísar til.

Þessi samningur ásamt samningnum um stofnun Alþjóðaviðskiptastofnunarinnar öðlast gildi 1. janúar 1995 eða eins fljótt og unnt er eftir það. Þau iðnríki sem eiga aðild að samningnum um stofnun Alþjóðaviðskiptastofnunarinnar hafa eins árs frest frá því að sá samningur öðlast gildi til að láta ákvæði samningsins um hugverkarétt í viðskiptum koma til framkvæmda.

Að því er lýtur að skuldbindingum kanadískra yfirvalda ætti að rýmka réttinn til verndar samkvæmt ákvæðum tilskipunar 87/54/EBE, frá og með 1. nóvember 1994 og þar til ákvæði samningsins um hugverkarétt í viðskiptum koma til framkvæmda, þannig að hann nái til einstaklinga, félaga og annarra lögpersóna frá Kanada.

SAMÞYKKT ÁKVÖRÐUN ÞESSA:

1. gr.

Aðildarríkin skulu rýmka lögverndina sem kveðið er á um í tilskipun 87/54/EBE eins og hér greinir:

- einstaklingar, sem eru ríkisborgarar í Kanada eða sem hafa fasta búsetu á yfirráðasvæði Kanada, skulu fá sömu meðferð og væru þeir ríkisborgarar aðildarríkis;
- félög og aðrar lögpersónur frá Kanada sem starfrækja raunveruleg iðnaðar- eða verslunarfyrirtæki í því landi skulu fá sömu meðferð og þeir sem starfrækja raunveruleg iðnaðar- eða verslunarfyrirtæki á yfirráðasvæði aðildarríkis.

2. gr.

Ákvörðun þessi gildir frá og með 1. nóvember 1994.

3. gr.

Ákvörðun þessari er beint til aðildarríkjanna.

Gjört í Lúxemborg 24. október 1994.

Fyrir hönd ráðsins,

J. BORCHERT

forseti.